

2023 级“郑师卓越教师班”暑期训练计划

古诗一百首

1、鹿柴

空山不见人，但闻人语响。
返景入深林，复照青苔上。

2、静夜思

床前明月光，疑是地上霜。
举头望明月，低头思故乡。

3、相思

红豆生南国，春来发几枝。
愿君多采撷，此物最相思。

4、登鹳雀楼

白日依山尽，黄河入海流。
欲穷千里目，更上一层楼。

5、江雪

千山鸟飞绝，万径人踪灭。
孤舟蓑笠翁，独钓寒江雪。

6、寻隐者不遇

松下问童子，言师采药去。
只在此山中，云深不知处。

7、春夜喜雨

好雨知时节，当春乃发生。

随风潜入夜，润物细无声。

8、所见

牧童骑黄牛，歌声振林樾。
意欲捕鸣蝉，忽然闭口立。

9、独坐敬亭山

众鸟高飞尽，孤云独去闲。
相看两不厌，只有敬亭山。

10、春晓

春眠不觉晓，处处闻啼鸟。
夜来风雨声，花落知多少。

11、草

离离原上草，一岁一枯荣。
野火烧不尽，春风吹又生。

12、乐游原

向晚意不适，驱车登古原。
夕阳无限好，只是近黄昏。

13、悯农（一）

锄禾日当午，汗滴禾下土。
谁知盘中餐，粒粒皆辛苦。

14、夜宿山寺

危楼高百尺，手可摘星辰。

不敢高声语，恐惊天上人。

15、夏日绝句

生当作人杰，死亦为鬼雄。
至今思项羽，不肯过江东。

16、梅花

墙角数枝梅，凌寒独自开。
遥知不是雪，为有暗香来。

17、八阵图

功盖三分国，名成八阵图。
江流石不转，遗恨失吞吴。

18、鸟鸣涧

人闲桂花落，夜静春山空。
月出惊山鸟，时鸣春涧中。

19、宿建德江

移舟泊烟渚，日暮客愁新。
野旷天低树，江清月近人。

20、渡汉江

岭外音书断，经冬复历春。
近乡情更怯，不敢问来人。

21、行宫

寥落古行宫，宫花寂寞红。

白头宫女在，闲坐说玄宗。

22、玉阶怨

玉阶生白露，夜久侵罗袜。
却下水晶帘，玲珑望秋月。

23、杂诗

君自故乡来，应知故乡事。
来日绮窗前。寒梅著花未？

24、送崔九

归山深浅去，须尽丘壑美。
莫学武陵人，暂游桃源里。

25、送灵澈上人

苍苍竹林寺，杳杳钟声晚。
荷笠带斜阳，青山独归远。

26、弹琴

泠泠七弦上，静听松风寒。
古调虽自爱，今人多不弹。

27、问刘十九

绿蚁新醅酒，红泥小火炉。
晚来天欲雪，能饮一杯无？

28、送上人

孤云将野鹤，岂向人间住。

莫买沃洲山，时人已知处。

29、送别

山中相送罢，日暮掩柴扉。
春草年年绿，王孙归不归。

30、蚕妇

昨日入城市，归来泪满巾。
遍身罗绮者，不是养蚕人。

31、画

远看山有色，近听水无声。
春去花还在，人来鸟不惊。

32、哥舒歌

北斗七星高，哥舒夜带刀。
至今窥牧马，不敢过临洮。

33、终南望余雪

终南阴岭秀，积雪浮云端。
林表明霁色，城中增暮寒。

34、江上渔者

江上往来人，但爱鲈鱼美。
君看一叶舟，出没风波里。

35、武侯庙

遗庙丹青落，空山草木长。

犹闻辞后主，不复卧南阳。

36、绝句（一）

江碧鸟逾白，山青花欲燃。
今春看又过，何日是归年。

37、塞下曲（一）

林暗草惊风，将军夜引弓。
平明寻白羽，没在石棱中。

38、塞下曲（二）

月黑雁飞高，单于夜遁逃。
欲将轻骑逐，大雪满弓刀。

39、剑客

十年磨一剑，霜刃未曾试。
今日把示君，谁有不平事。

40、送朱大入秦

游人五陵去，宝剑值千金。
分手脱相赠，平生一片心。

41、别诗

洛阳城东西，长作经时别。
昔去雪如花，今来花似雪。

42、绝句（二）

迟日江山丽，春风花草香。

泥融飞燕子，沙暖睡鸳鸯。

43、辛夷坞

木末芙蓉花，山中发红萼。
涧户寂无人，纷纷开且落。

44、题诗后

两句三年得，一吟双泪流。
知音如不赏，归卧故山秋。

45、于易水送人

此地别燕丹，壮士发冲冠。
昔时人已没，今日水犹寒。

46、何满子

故国三千里，深宫二十年。
一声何满子，双泪落君前。

47、听筝

鸣筝金粟柱，素手玉房前。
欲得周郎顾，时时误拂弦。

48、风

解落三秋叶，能开二月花。
过江千尺浪，入竹万竿斜。

49、竹里馆

独坐幽篁里，弹琴复长啸。

深林人不知，明月来相照。

50、悯农（二）

春种一粒粟，秋收万颗子。
四海无闲田，农夫犹饿死。

51、照镜见白发

宿昔青云志，蹉跎白发年。
谁知明镜里，形影自相怜。

52、七步诗

煮豆燃豆萁，豆在釜中泣。
本自同根生，相煎何太急？

53、过故人庄

故人具鸡黍，邀我至田家。
绿树村边合，青山郭外斜。

54、秋浦歌（一）

白发三千丈，缘愁似个长。
不知明镜里，何处得秋霜？

55、月下独酌

花间一壶酒，独酌无相亲。
举杯邀明月，对影成三人。

56、晚晴

深居俯夹城，春去夏犹清。

天意怜幽草，人间重晚晴。

57、游子吟

慈母手中线，游子身上衣。
临行密密缝，意恐迟迟归。

58、送兄

别路云初起，离亭叶正稀。
所嗟人异雁，不作一行飞。

59、春庄

山中兰叶径，城外李桃园。
岂知人事静，不觉鸟声喧。

60、秋浦歌（二）

炉火照天地，红星乱紫烟。
赧郎明月夜，歌曲动寒川。

61、拜新月

开帘见新月，便即下阶拜。
细语人不闻，北风吹裙带。

62、惊雪

怪得北风急，前庭如月辉。
天人宁许巧，剪水作花飞。

63、长相思

九月西风兴，月冷露华凝。

思君秋夜长，一夜魂九升。

64、江村夜归

月落江路黑，前村人语稀。
几家深树里，一火夜渔归。

65、题西施石

岭上千峰秀，江边细草春。
今逢浣纱石，不见浣纱人。

66、春望

国破山河在，城春草木深。
感时花溅泪，恨别鸟惊心。

67、旅夜书怀

细草微风岸，危檣独夜舟。
星垂平野阔，月涌大江流。

68、马诗

大漠沙如雪，燕山月似钩。
何当金络脑，快走踏清秋。

69、元夕

去年元夜时，花市灯如昼。
月上柳梢头，人约黄昏后。

70、宿芙蓉山

日暮苍山远，天寒白屋贫。

柴门闻犬吠，风雪夜归人。

71、田上

雨足高田白，披蓑半夜耕。
人牛力俱尽，东方殊未明。

72、早梅

万木冻欲折，孤根暖独回。
前村深雪里，昨夜一枝开。

73、江行无题

万木已清霜，江边村事忙。
故溪黄稻熟，一夜梦中香。

74、明日歌

明日复明日，明日何其多。
我生待明日，万事成蹉跎。

75、望月怀远

海上生明月，天涯共此时。
情人怨遥夜，竟夕起相思。

76、月夜忆舍弟（一）

戍鼓断人行，边秋一雁声。
露从今夜白，月是故乡明。

77、月夜忆舍弟（二）

有弟皆分散，无家问死生。

寄书长不达，况乃未休兵。

78、渡荆门送别（一）

渡远荆门外，来从楚国游。
山随平野尽，江入大荒流。

79、渡荆门送别（二）

月下飞天镜，云生结海楼。
仍怜故乡水，万里送行舟。

80、商山早行

晨起动征铎，客行悲故乡。
鸡声茅店月，人迹板桥霜。

81、望岳（一）

岱宗夫如何？齐鲁青未了。
造化钟神秀，阴阳割昏晓。

82、望岳（二）

荡胸生曾云，决眦入归鸟。
会当凌绝顶，一览众山小。

83、使至塞上（一）

单车欲问边，属国过居延。
征蓬出汉塞，归雁入胡天。

84、使至塞上（二）

大漠孤烟直，长河落日圆。

萧关逢候骑，都护在燕然。

85、雪

尽道丰年瑞，丰年事若何？

长安有贫者，为瑞不宜多。

86、陇西行

十里一走马，五里一扬鞭。

都护军书至，匈奴围酒泉。

87、山中

荆溪白石出，天寒红叶稀。

山路元无雨，空翠湿人衣。

88、入日思归

入春才七日，离家已二年。

人归落雁后，思发在花前。

89、秋日湖上

落日五湖游，烟波处处愁。

浮沉千古事，谁与问东流。

90、赠孟浩然

吾爱孟夫子，风流天下闻。

红颜弃轩冕，白首卧松云。

91、关山月

明月出天山，苍茫云海间。
长风几万里，吹度玉门关。

92、过香积寺

不知香积寺，数里入云峰。
古木无人径，深山何处钟。

93、次北固山下（一）

客路青山外，行舟绿水前。
潮平两岸阔，风正一帆悬。

94、次北固山下（二）

海日生残夜，江春入旧年。
乡书何处达？归雁洛阳边。

95、送杜少府（一）

城阙辅三秦，风烟望五津。
与君离别意，同是宦游人。

96、送杜少府（二）

海内存知己，天涯若比邻。
无为在歧路，儿女共沾巾。

97、题破山寺

清晨入古寺，初日照高林。
曲径通幽处，禅房花木深。

98、赠从弟

亭亭山上松，瑟瑟谷中风。

风声一何盛，松枝一何劲。

99、梁甫行

八方各异气，千里殊风雨。

剧哉边海民，寄身于草野。

100、送友人

青山横北郭，白水绕东城。

此地一为别，孤蓬万里征。